

Car Amic ZEFIR,

De tot temps las societats an servat fièrament la memòria de lors grands òmes, aquelses que per lor trabalh, lors òbras e lor coratge nos an mostrat la dralha que devèm sègre ; aquelses que son lo lum qu'esclaira nòstre canton e que seràn totjorn per nòstre pòple de profetas e de guides : Zefir BOSC éra d'aqueles.

Oc, Zefir incarna l'ama prigonda de nòstre pòple occitan e sa vida entièra es un acte d'amor per son pòple e sa lenga.

Aviá comprés el, a una epòca ont la glèisa , l'escòla e totes los mecoses e toca- manetas de tota borra, sutaban los òrdres de Paris, e donavan a nòstre pòple la vergonha de sa cultura , que la cultura del Roèrgue, duèi coma ièr, es estada occitana avant d'èsser francesa o universal.

Aviá comprés, que la cultura se viu, se farga e qu'es un biais de viure e de mestrejar sa vida. Aviá comprés que caldriá li donar los mejans materials e morals de viure dins la societat de duèi.

En vertadièr apòstol de la fe occitana siaguèt un des membres fondators del Centre Cultural Occitan del Roèrgue en 1979.

S'avoda del brès a la tomba a glorificar son país , sa lenga e sa cultura occitana es una capitada de las bèlas !!! Lo Majoral Zefir BOSC visquèt pas que d'aquel ideal dins la frairièra e l'amistat.

Per clavar, aquelas bonas paraulas de Zefir, que vos daissi per far solhel.

PAUL BONY

CENTRE CULTURAL OCCITAN DEL ROERGUE

VENT D'ESPER

Ventolet qu'amistosa la tèrra
Qu'en tot luòc, nos apòrtes solatz
Per aquel que patís de tot latz
Garda-lo de la trista misèra
Qu'agèm pas entre fraires la guèrra
E jol cèl, fai que brilhe la patz.